

求恕齋
叢書

雪橋詩話續集

雪橋詩話續集

森叟署檢

大著訂正一冊細讀未竟以茲遺失先

細四極痛懷極和平以茲訂正更厚

之至也佩極之此速別成可以淑勸

卷五也

留院分第紅宗

卷五

三十一

雪橋詩話續集序

留垞楊先生旣成雪橋詩話十二卷雕板訖旋又成續集八卷屬贅一言弁厥首竊以謂聖清二百數十年之間聖祖高宗籠百學以啟文治弘才異智輩出踵起尤以博雅通經術擅校讐絕業幾追漢宋睨元明而遠過之而發爲詩歌派別亦盛卽非以自名者零章斷句不失爲純雅之音蓋涵濡悠久之澤氣機才思之所自闢皆有不可掩焉者也留垞所爲詩話掇拾所及比類事跡甄綜本末一關於政教學術風俗及其人行誼遭遇網羅放失彰聞幽隱儼然垂一代之典備異日史

官之采擇漁者際於海魚龍鼉鼉萬族之所託鱗爪之光怪濡沫之迴旋有異焉者萬仞之山量馬牛之谷樵子躑躅而歷焉鳥獸之叫音卉草之華實有異焉者咸詫而播之以狀某海某山之有以身爲漁樵聞見所極固有不得而忘也留垓所蓄不可際涯辛亥之變避亂滬濱踟天躋地僂然安之但取故紙殘帙託之山海日漁樵於其中獲而獻獻而自憊不知日月之相代乎前也姑寄其哀窈窕思賢才以默契聖尼郁郁乎文哉吾從周之志沒吾身而已矣後之論者攷其世而察其所尙其諸有哀於此歟丁巳六月陳三立

雪橋詩話續集序

吾嘗讀春秋外傳至衛彪傒之咎萇劉而歎周人之詩
自周人說之而失其意者固已多矣天之所支不可壞
也其所壞亦不可支也武王克殷作爲此詩蓋謂天命
靡常周之受殷用天人之和非以彊力云爾若夫保世
滋大祈天永命凡見於三百篇者何其殷且摯也天道
道可而省不水火之所犯猶不可救誠如所言將天下
興亡皆委之於天運而已無與焉彼夫憂天夾日之誠
皆所謂違天反道而爲萇叔劉文公之續者也豈不謬
哉後世之說詩者不揆其時之所遭志之所存而欲得

作者之意皆衛彪傒之類也聖遺居士所爲雪橋詩話
旨遠詞文不爲空綺大意所在欲使讀本朝之詩者有
以見詩中之人詩外之事而已丙辰之夏復成績集八
卷一如前指或有獻疑於承幹者曰古人之詩多矣居
士概不之及而獨取本朝之詩窮年累月屏棄人事簪
述之而未有已子亦不憚煩役爲之賡續刊行不其贅
乎嗟乎此王仲任之所由興歎也家人子弟學問歷幾
歲人問之曰居宅幾年祖先何爲不能知者愚子弟也
儒生不知漢事世之愚蔽人也周人著書多說周人之
詩得失雖殊其致一也又何疑焉丁巳夏四月續集既

數工遂書其語以爲之序吳興劉承幹

雪橋詩話續集卷第一 求恕齋叢書

遼陽楊鍾義撰集

吳興劉承幹參校

漁洋癸亥稿與趙秋水話申鳧盟遺事感賦云淦水去

涓涓東流繞墓田忽驚辰巳夢重憶甲申年

謂鳧盟尊人節愍公

甲申節夜雨唳山鬼青春叫杜鵑平生趙元叔白首話鐙

前鳧盟嘗作毛穎後傳略云自楚漢遞興能者皆起效

一技而穎獨以老病自全挺立不屈豈慕孤竹之遺風

歟然身晦而子孫用使富貴不絕可謂善處名實者矣

文雖滑稽自有寄託其哀流民和魏都諫云流民自北

來相將南去問南去何處言亦不知處日暮荒祠淚下
如雨飢食草根草根春不生單衣曝背雨雪少晴老稚
尪羸喘不及喙壯男腹雖飢尙堪負戴早春糧夕牧馬
嫗幸哀憐請宿茅簷下主人外至長鞭驅走東家誤留
軍人殺戮流血禍及雞狗日淒淒風破肘流民掩泣主
人搖手聶夷中之所不及陳鄭一拂之不能繪者詩能
曲爲寫出此詩江西詩徵作安福康若生作當是誤收
其元夕云百戰山河異春鐙舊俗存魚龍張紫燄鐘鼓
動黃昏到處能看月今宵亦閉門歡娛思宿昔嗚咽罷
開尊則易代之感也鳧盟截句最佳已見前集茲復錄

其燕京卽事四首山前免急雁飛號黑霧黃塵落毳袍
獵罷歸來催夜飲江南少婦解弓刀漢時秦原罷曉鐘
黃綃牙軸市塵封畫圖往往多隆準傳是先朝舊御容
日暮垂鞭過畫樓市旁舞女木絲裘歌聲尙帶殊方語
半是揚州半潞州郭外香車錦作圍順城門下馬爭飛
獨憐貧女無顏色拾得殘花首戴歸

西安張炳璿儀昭癸未夏日卽事感懷云租吏徧鄉縣
銀鐙滿署前囊頭人似鬼候比日如年甕已甘離井羈
當苦鬻男宰官寧忍此無力可回天兩月全無雨秋禾
半已枯況當軍餉急無日不追呼剛了添丁債旋催隔

甲逋心頭肉已盡能復顧臀膚可以想見明季賦役之
重龔晉之詩金矢每敲亡命隨城髡半屬富民頭皆指
事直陳不嫌其言之近俚

明莊烈帝葬鹿馬山關中王宏撰嘗於三月十九日制
劄山下泣奠自稱鹿馬山人陽山李沂爲作鹿馬山人
歌沂字子化一字艾山號壺菴映碧廷尉從弟也著鸞
嘯堂集丙寅元日云老屋河干漸不支年來河伯故相
欺顏垣缺壁還風雪濁酒辛盤自歲時浪把一生供敝
帚獨留雙眼看殘棋陽回少慰幽人意檢點殘花放幾
枝王于一閏三月十九日詩云感此今何日敷天有閏

愁

周斯二菴悲歌集有燕山三老詩云圓冠方領漢衣裳
地偏燕山倍感傷三老何如商四皓不從太子事差強
三老一居良鄉縣南五里一居商家林一居單家橋惜
不詳其姓字他日得歸丙舍當訪之土人不知能有言
之者否

張覆輿豁村卽事云羃歷樹中行潺湲石瀨清野花開
閒色秋鳥落寒聲家住愚公谷書傳老伏生鄰人自來
往口見不知名當時北地詩人皆不涉鍾譚一派覆輿
營南至襄州有昭明臺孟亭諸詩磁州沁水皆其游屐

所經其七里峽長律不減小長蘆釣師

張蒿菴長亭林一歲亭林與汪鈍菴書云張君稷若所作儀禮鄭注句讀一書根本先儒立言簡當使朱子見之當不僅謝監獄之稱許也又嘗言獨精三禮卓然經師吾不如張稷若蒿菴歿亭林以詩哭之云厯山東望正淒然忽報先生赴九泉寄去一書懸劍後貽來什襲絕韋前衡門月冷巢鷺室墓道風枯宿草田從此山東問三禮康成家法竟誰傳

王山史山志青門七子皆宗室之賢而篤於學者也各有詩文集卓然成家余所及與之游者子斗翁而已亂

後數往省之翁亦喜余嘗對人有松柏之譽翁于伯嘗
存枉年長於余以翁與余善而待余以執友之禮甚恭
然余固尊事翁不敢以雁行進也嘗與顧亭林言及亭
林入青門特訪其家時翁已歿見伯嘗索翁著作讀之
今伯嘗亦歿其子孫冒楊氏蓋從翁之母姓也亭林集
有朱子斗詩序伯嘗變名楊謙住西安府南八里大塔
堡內大塔者慈恩寺塔也其子烈及甥王太和皆受業
於亭林亭林將去關中別中尉存枉於慈恩寺塔下云
廓落悲王子棲遲愛友朋荒郊紆策馬獵徑傍鞦鷹土
室人稀到衡門客少簷傾壺頻進酒散帙每挑鐙歎息

當憂患仙人獨戰兢薄田遺豆麩童阜贍薪蒸疾病嗟
年老虔恭尙夙興芋魁收蜀郡瓜種送東陵世業爲奴
有空名任盜憎幸餘忠厚福猶見子孫承渭水徂年赤
岐山一夜崩低頭從竈養脫蹟溷林僧毒計哀阮趙淫
刑虐用鄆忠魂依井植碧血到泉凝賊陷西安令弟
存柘投井死困
鬣時防罟驚禽早避繒屢捫追駟舌莫運擊蛇肱謬忝
師資敬多將氣誼憑深情占復始積德望高升子建工
詩早河閒好學稱堂垣逾舊大國邑與前增九鼎知猶
重三光信有徵沈薤隨劍璽變化待鯤鵬樹落龍池雪
風懸雁塔冰更期他日會拄杖許同登丙午有得伯嘗

書卻寄並示二門人詩

亭林題李先生矩亭詩序德州東二十五里矩亭故鄉
舉思伯李君誠明讀書處天啟中權奄柄國聞君通陰
陽象緯之學遣使徵之辭疾不就潔志以終其子源修
是亭以表遺躅余爲之詩源字江餘一字星來順治丙
戌進士授河津令有能稱罷歸後築退菴因以自號植
花竹購圖籍和易好讀書至老不衰亭林聞其談易數
歎曰今之管輅也亭林戊戌赴東手蹟所謂北李家卽
此甲寅有過矩亭拜李先生墓下詩

孫觚本衡藩之後名慈愈字火西曾舉崇禎壬午山東